



partii naleraq

14. februaari 2019

UPA2019/imm.nr 221

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Piniakkat killilersukkat Avannersuarmi Ittoqqortoormiinilu qilalukkat qernertat qaqortallu, aaveq aamma nanoq pillugit periarfissaqarnerseq misissuisoqassasoq, kiisalu sunik suliniutinik killilersuisoqarunnaarnissaa pillugu Naalakkersuisut UPA2020-imut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Jens Napâtôk', Partii Naleraq)

Tunngavilersuut:

Avannersuarmi Ittoqqortoormiinilu ilisimaneqarpoq innuttaasut amerlanerpaat piniarnerinnarmik inuussutissarsiuteqartuusut. Ilisimaneqarporlu Avannersuarmi Ittoqqortoormiinilu piniariaatsit kinguaariit kingornuttagaat aallaavigalugit piniartarneq ingerlanneqartarsimasooq ingerlanneqartuarlunilu ulloq manna tikillugu.

Piniartutut inuussutissarsiuteqartut piniariartarfimmini piniakkaminnik nungutsaaliuillutik aaqqissuussaqaarsimapput Kalaallit Nunaat Landsråd-eqanngikkallarmalli, Kalaallit Nunaat Namminersornerulersimanngikkallarmalli aamma Kalaallit Nunaat Namminersornermik eqqussinngikkallarmalli. Namminneerlutik "maleruaqqusatut" allanneqarsimanngitsunilli malitassaqaarlutik piniartoqatigiit iluminni aaqqissuussimasaminnik malitassaqaarnertik ukiuni untritilinni maniguuffigalugit ingerlattuarsimavaat.

Kalaallit inuiaqatigiit umaannarnissaannik napaannarnissaannillu qularnaarinnissimasuupput, minnerpaamik namminneerlutik "maleruaqqusaminnik" malitaqaarnertik pissutigalugu Inatsisiliortutut ataqqisariaqakkatsinnit.

Piniakkanik killilersuineq 2004-imili eqqunneqarpoq, siullersaallutik killilersorneqalersimallutik qilalukkat qernertat aamma qilalukkat qaqortat, killilersuineq tunngaveqartinneqarluni qilalukkat qernertat aamma qaqortat ikiliartulersimanerannik. Taamanerniillu qilalukkanik qernertanik aamma qaqortanik pisassiisarneq eqqunneqarsimalluni, ulloq manna tikillugu.

Nannunik killilersuineq 2005-imimi eqqunneqarpoq taamatullu aaveq 2006-imi killilersorneqalerluni. Killilersuinerit eqqunneqarneranni pissutaatinneqarpoq uumasut ikiliartulersimanerat unitsinniarlugu. Taakkunangalu uumasunik miluumasunik pisassiisarneq eqqunneqarluni.

Pisassiisarnerit ajunngitsumik kinguneqarsimasut ilanngullugu eqqaaneqarpoq. Taamaattoq piniartutut inuussutissarsiuteqartumut killilersuinerup eqqunneqarneraniit pisassiisarnerit eqqunneqarnerat ilanngullugu neqissaqarniarnerminni aamma aningaasarsiornerminni annertuumik kinguariaatigisimassagaat naatsorsuutigisinnaavarput.

Nuna manna inatsisitigut aaqqissuussivigissavarput inuiaat kalaallit pisuussutigut atorluagassanngorlugit imarsuup aamma nunarsuatta tunniuttagai aallaavigalugit, minnerunngitsumillu immitsinnut aallaavigaluta. Eqqaamasaqartoqarunanngilaq piniartutut inuussutissarsiuteqartut piniakkaminnik nungutsisimasut, piniartutut inuussutissarsiuteqartut piniariartarfisik ilisimaareqqissaarlugu aammalu nungutsaaliuillutik piniakkaminnik piniartarmata, piniakkatimmi nungukkaluarunikkit suna inuussutigisagamikku?

Taamaattumik pissusissamisoortut Partii Naleqqamiit isigaarput piniakkat killilersukkat qilalugaq qernertaq, qaqorta, aaveq aamma nanoq pillugit periarfissaqarneris misissuisoqassasoq, kiisalu sunik suliniutinik killilersuisoqarunnaarnissaa pillugu Naalakkersuisut UPA2020-mut peqqussallugit.

Pisortanut aningaasatigut allaffissornikkullu kingunerisassai:

Misissuineq naatsorsuutigineqarpoq ilinniagartuumik suliarineqassasoq ukiup ataatsip missaanik 500.000,00 koruuninillu naleqassalluni.

Namminersortunut aningaasaatigut allaffissornikkullu kingunerisassai:

Namminersortunut aningaasatigut allaffissornikkullu kinguneqartitsisoqarnissaa naatsorsuutigineqanngilaq.

Innuttaasunut aningaasatigut allaffissornikkullu kingunerisassai:

Innuttaasunut allaffissornikkut kinguneqartitsisoqassanngilaq, parlattuanik inuussutissarsiutigalugu piniartukkormiunut aningaasatigut inuuniarnikkullu ilorraap tungaanut inissittoqarsinnaanera naatsorsuutigineqarpoq.